

Wanem ia El Niño mo wanem nao olgeta efekt hemi gat long Vanuatu?




El Niño hemi folem bigfala sefes blong solwota we i wom long sentrol mo long is blong tropikol Pasifik i go long kos blong Saot America.

Plante taem i mekem ren i stap foldaon anda long averej mo hae bitim averej tempereja ova long plante pat blong Vanuatu long sisen blong ren (Novemba kasem Eprel) mo drae sisen (Mei kasem Oktoba).

Olgeta Tropikol saeklon i no stap hapen tumas long taem blong El Niño.

El Niño i stap tekem ples evri 3 kasem 7 yia mo bambae i save stap blong 9 kasem 12 manis, mo samtaem i save tekem long taem moa. Hemi save mekem ples i drae long olgeta pat blong kaontri we oli drae finis. Taem yumi andastanem El Niño, yumi save helpem olgeta komuniti blong pripea gud blong katem daon risk mo lusum laef.



Wanem nao i kosem El Niño?




El Niño hemi pat blong wanem we oli kosem El Niño - Southern Oscillation (ENSO).

Simpol wei blong andastanem El Niño hemi tru long muvmen blong wom wota long osen.

Top leya blong tropikol Pasifik Osen (kolosap long fes 200 meta) i wom, wetem tempereja blong wota bitwin 20°C. Andanit long solwota, i gat wan tempereja we i moa kolkol mo i no jenis.

Long wan taem blong El Niño, olgeta tred win oli no strong mo sam long olgeta wom wota oli flo long is i go from America. Muvmen blong wom wota i katem daon posibiliti blong ren we i save foldaon long Vanuatu.



Olsem wanem nao bae yu redi from El Niño?

El Niño i bin stap tekem ples ova long 100 yia finis, mo oli stap talem se bambae hemi go moa nogud anda long klaemet jenis. Be naoia we yumi no save stopem taem blong ples i drae we El Niño i kosem, yumi save pripea from olgeta blong mekem se oli no save gat tumas impak long wanem we yumi mekem.

Stap Helti oltaem

Blong sevem wota long olgeta eben eria:

- Swim smol taem nomo.
- Sarem wota taem yu stap brasem tut blong yu o taem yu stap shev.
- No flasem toilet taem yu no nidim.
- Jekem eni tap o olgeta paep we oli lik mo fiksime olgeta.
- Klinim trak blong yu wetem wan bakel blong wota, no yusum hos paep.
- Mekem sua blong yusum olgeta plant we oli no nidim tumas wota.

Blong sevem wota long olgeta rurol eria:

- Traem yusum solwota, riva o olgeta pul blong save yusum long haus olsem blong wasem olgeta tul blong kijin.
- Enkarejem olgeta pikinini blong no pleple wetem wota mo letem olgeta oli save long impotens blong sevem wota.
- Yusum wota blong olgeta niufala bambu mo rop blong bus blong drink.



Growing crops

Sipos yu planem kakae, El Niño i minim se bambae yu gat smol wota nomo i stap blong olgeta kakae blong yu. Tempereja i go antap folem wetem El Niño i minim tu se wota we yu gat i stap i save drae.

Blong pripea, olgeta fama oli save:

- Inkrisim prodaksen blong kakae blong olgeta blong mekem se shotej blong wota i no save afektem olgeta tumas, olsem olgeta kakae we oli gat rus (Maniok, kumala, swit taro, mo yam).
- Stop blong klinim bus we i help blong kipim graon i wetwet.
- Yusum olgeta difren kaen teknik blong faming (maljing, planem tu (2) o moa varaiti long semak ples).
- Yusum olgeta tradisinol teknik blong sevem kakae.



Managing livestock

Sipos yu lukaotem laefstok, bambae El Niño i save katem daon prodaksen blong gras mo kosem hit insaed long olgeta buluk blong yu. Buluk we i safa long hit bambae i no save gro gud mo i no save bonem tumas bebe.

Blong pripea, olgeta fama oli save:

- Salem stok we i olfala mo hemi we i no prodaktiv be mentenem bridging stok blong olgeta.
- Kipim eni bigfala tri long eria blong olgeta, we i save givim shed long buluk mo helpem olgeta blong save fesem olgeta hae tempereja.
- Introdusum olgeta niufala kaen buluk we oli save stap long ples we i gat hae tempereja mo smol wota; olsem Brahman/ Africanda.
- Fidim olgeta pig wetem kakae we i gat bigfala wota long hem (paenapol, banana, and olgeta grin lif).
- Introdusum olgeta kaen faol we oli strong blong stap long ples we i drae; olsem African/ Braon Egg Layer



Maintaining forestry

Sipos yu pat long forestri, wetem El Nino long taem we ples i drae mo tempereja i hae bitim nomol wan, bambae i save spolem gud olgeta tri blong yu blong oli no save gro gud.

Blong pripea, olgeta man we oli pat long forestri oli save:

- Digim drenej raon long olgeta tri blong slowem daon evaporesen blong wota.
- Yusum grin haus blong leftemap/kontrolen prodaksen blong frut.
- Statem atifisol geminesen long olgeta impoten spesis.
- Faenemaot mo movumaot olgeta spesis we oli stap long risk i go long olgeta ples we i gat wota long hem.
- Wasem wanwan long olgeta tri we oli gat hae valiu, wetem wan baket o narafala wei blong wasem wetem wota.

Blong karem moa infomesen long preperesen blong El Nino, plis visitim:

<http://www.vmgd.gov.vu>

Telefon: **24686**

Imelem: climate@meteo.gov.vu

Port Vila,

Ripablik blong Vanuatu



Vanuatu Meteorology & Geo-hazards Department



El Niño: Taem blong ples i drae

